

Immikkoortortaqaarfiup aqqa aamma angerlarsimaffia:

§ 1. Immikkoortortaqaarfiup aqqa \_\_\_ Peqatigiit ateraat: Sulinermik inuussutissarsiuteqartut Peqatigiiffiat Kangaamiut, Kangaamiuni aallartippoq 14 marts 1961. Naalisarlugu SIPK

§ 2. Immikkoortortaqaarfiup angerlarsimaffia : Kangaamiut. 3912 Maniitsoq

§ 3. Immikkoortortaqaarfik Sulinermik inuussutissarsiuteqartut Kattuffiannut (SIK) ilaavoq.

Siunertaq suliassallu

§ 4. Immikkoortortaqaarfiup siunertaraa suliassaralugillu suliffeqarfinni sulisut sinniisaat suleqatigalugit Immikkoortortaqaarfiit allat SIK-llu ingerlatsivii allat, soorlu SIK-p allattoqarfia, kingunissalimmik suleqatiginerisigut ilaasortanut iluaqutissiinissaq. Sulisartut aamma lærlingit/ilinniartut sumiiffimmiittut tamaasa ataatsimoortissallugit akissarsiatigut atorfeqarnikkullu atugassarisanik pitsaasunik kiisalu sullivinni suliffeqarnikkut avatangiisinik toqqissisimanartunik angusaqarumalluni. Isumaqatigiissutit inatsillu atuuttut - soorlu sullivinni avatangiisit pillugit - illoqarfimmi/nunaqarfimmi suliffeqarfinni eqquutsinneqarnissaat sulisutigissalugu. Ilaasortat suliffeqannginnerisa napparsimanerisalu nalaanni pisariaqartitaminnik ikiorneqartarnissaasa sulisutiginnissaat. Sulisartut peqatigiinneranni kammalaatigiinerannilu katersuuffiussalluni. Ilaasortat pisinnaatitaaffii pillugit siunnersortassallugit. Suliffinni isumaqatigiinnginnerni, soorlu inunnut aalajangersimasunut tunngatillugu suliassani ilaasortat akuuffigisaanni, ilaasortat soqutigisaannik SIK-p allattoqarfia suleqatigalugu illersuissalluni. Illoqarfimmi/nunaqarfimmi suliffinni sulisut sinniisaannik qinersinissaq qulakkiissallugu, aammalu sulisut sinniisaasa qinerneqartut aqqinik SIK-p allattoqarfianut ilisimatitsissuteqassalluni. Sulisut sinniisaasa suliaat pillugit sulisitsisunik isumaqatigiissutit malinneqarnissaat qulakkiissallugu.

Ilaasortat

§ 5. Ilaasortanngortinneqarsinnaapput kikkugaluartulluunniit SIK-p malittarisassaani § 3-mi piumasaqaatinik naammassinnittut.

§ 6. Ilaasortanngorneq pissaaq immersugassamik immersuinikkut atsiunikkullu. Ilaasortaa-junnaarneq imaluunniit allannguutitut taamatuttaaq nalunaarutigineqassapput.

Imm. 2. Ilaasortat nutaat immikkoortorta qarfiup sulinera pillugu paasisstissinneqartarnissaannut siulersuisut akisussaapput.

Imm. 3 Ilaasorta qqaammammut ulloq naallugu sulisartoq 210 kr.nik akiliisassaaq, ullullu affaanut sulisartoq qqaammammut 105 kr.nit

#### Ataatsimeersuarneq

§ 7. Ataatsimeersuarneq tassaavoq immikkoortorta qarfimmi oqartussaasoq qullerpaaq.

Imm. 2. Ileqqusumik ataatsimeersuarneq ukiut marlukkaarlugit ingerlanneqartassaaq marts-ip qaammataa naatinnagu kingusinnerpaamillu ullut 14-nit sioqqullugit najukkami atuagassatigut nittarsaanikkut, taamaattoqarpat, kiisalu illoqarfiup/nunaqarfiup allagarsii-viisigut kiisalu suliffeqarfinni allagartaliilluni ilimasaaruteqarnikkut ataatsimeersuaariaq-qusisoqartassalluni. Peqatigiit ukiut tamaasa ataatsimeersuartassaaq marts qaammat naatinnagu. Siulersuisunut qinigaasimasut ukiut marluk atasassapput.

Imm. 3. Ataatsimeersuarnermi oqaaseqarsinnaatitaasut taasisinnaatitaasullu tassaapput ilaasortaanermut akiliuteqarsimasut tamarmik. Pisinnaatitsissuteqarluni imaluunniit allakkatigut taasisoqarsinnaanngilaq.

§ 8. Ileqqusumik ataatsimeersuarnermi ullormut oqaluuserisassat ikinnerpaamik makkuninnga imaqqassapput:

- Ataatsimeersuarnermi aqutsisussamik imaqarniliortussamillu toqqaaneq
  - Siulersuisut nalunaarutaat
  - Naatsorsuutini kukkunersiukkanik ilisimatitsissutitut saqqummiussineq
  - Siunnersuutit takkuttut
  - Ilaasortaanermut akiliutip aalajangersarneqarnera
  - Missingersuutit akuerineqarnerat
  - Siulersuisunut qinersineq
- a) Siulitaasoq
  - b) Siulittaasup tullia
  - c) Allatsi
  - d) Siulersuisunut ilaasortat marluk
  - e) Sinniisussat marluk

• Taasariaqartut allat

§ 9. Ilaasortat immikkoortorta qarfirmut atassuteqartut tamarmik siulersuisunut qinigaasinnaapput.

§ 10. Siunnersuutit ataatsimeersuarnermi eqqartortikkusutat siulersuisunit tiguneqareer-simassapput ataatsimeersuarnissaq kingusinnerpaamik ullunik 8-nik sioqqullugu. Ilaasortat § 7 imm. 3 naapertorlugu oqaaseqarsinnaatitaallutillu taasisinnaatitaasut tamar-mik siunnersuutininik taamaattunik saqqummiussisinnaapput.

§ 11. Ataatsimeersuarnermi nalinginnaasumik amerlanerussuteqarnikkut aalajangersaa-soqartassaaq, malittarisassani allamik allassimasoqanngippat. Taasinerit naligiippata siun-nersuut peerneqassaaq; taamaattorli inummik qinersineq ingerlanneqarpat qinersisoqaaq-qissaaq. Qinerseqqinnermi taasinerit naligiippata makitsinikkut qinersineq ingerlanneqas-saaq.

Imm. 2. Allalluni taasinerit ingerlanneqartassapput, tamanna ataatsimeersuarnermi peqa-taasumit ataatsimit kissaatigineqarpat, kiisalu siulersuisunut qinigassanngortittut siulersu-isuni ilaasortanit amerlannerit qinigassanngortippata.

§ 12. Ataatsimeersuarnermi SIK-p malittarisassaanut immikkoortorta qarfiullu nammineq malittarisassaanut akерliusumik aalajangiisoqarsinnaanngilaq, aalajangiinerillu pisassapput SIK-p ataatsimeersuarnerani imaluunniit nakkutilliisoqarfimmi siulersuisuunerniluunniit aalajangiinerit ataqqillugit.

§ 13. Ataatsimeersuarnermit imaqarniliaq SIP-p allattoqarfianut nassiunneqassaaq kingu-sinnerpaamik ataatsimeersuarnermi sap.ak. 3 qaangiutsinnagit.

Immikkut ittumik ataatsimeersuarneq

§ 14. Immikkut ittumik ataatsimeersuortoqarsinnaavoq siulersuisuni amerlanerussuteqar-tut tamanna pisariaqartutut isigippassuk imaluunniit sulisut sinniisaasa pingajorarterutaasa ilaasortalluunniit pingajorarterutaasa atsiornermikkut tamanna piumasarippassuk. Piumasarineqartoq ullormut oqaluuserisassatut siunnersuummik ilaqartinneqassaaq.

Imm. 2. Immikkut ittumik ataatsimeersuarneq ingerlanneqassaaq tamatuminnnga piuma-saqarnerup siulersuisunit tiguneqarneranit kingusinnerpaamik sap.ak. 3 qaangiutsinnagit.

Imm. 3. Immikkut ittumik ataatsimeersuariaqqusisoqassaaq sivikinnerpaamik ullut 14-it sioqqullugit najukkami atuagassiatigut nittarsaanikkut, taamaattoqarpat, kiisalu illoqarfiup/nunaqarffiup allagarsiiviisigut kiisalu suliffeqarfinni allagartaliilluni.

Imm. 4. Immikkut ittumik ataatsimeersuarnermi siulersuisunut qinersisoqarpat qinersineq

ileqquusumik ataatsimmeersuarnissap tulluuttup tungaanut atuutissaaq.

Imm. 5. § 9 aamma §§ 11-13 taamatutaaq atorneqassapput immikkut ittumik ataatsimeersuarnermi.

Ilaasortat ataatsimiinnerat

§ 15. Ukiuni ataatsimeersuarfiunngitsuni ilaasortanik ataatsimiisitsisoqartassaaq. Ataatsimiinneq marts-i naatinngu pissaq, sivikinnerpaamillu ullunik 14-nik sioqqullugu ataatsimiigiaqqusisoqassaaq najukkami atuagassiani, taamaattoqarpat, nittarsaanikkut kiisalu illoqarfiup/nunaqarfiup allagarsiiviisigut suliffeqarfinilu allagarsiinikkut.

Imm. 2. Ilaasortat ilaasortanut akiliummik akiligassiissutaasimasumik akiliisimasut tamarmik ilaasortat ataatsimiinneranni oqaaseqarsinnaallutillu taasisinnaatitaapput. Pisinnaatitsis-suteqarluni imaluunniit allakkatigut taasisoqarsinnaanngilaq.

§ 16. Ilaasortat ataatsimiinneranni ullormut oqaluuserisassat ikinnerpaamik makkuningga imaqasapput:



1. Ataatsimiinnermi aqutsisussamik imaqarniliortussamillu toqqaaneq
2. Siulersuisut nalunaarutaat
3. Naatsorsuutini kukkunerisiukkanik ilisimatitsissutitut saqqummiussineq
4. Siunnersuutit takkuttut
5. Ilaasortaanermut akiliutip aalajangersarneqarnera
6. Missingersuutit akuerineqarnerat
7. Taasariaqartut allat

§ 17. §§ 10-13 taamatuttaaq atorineqassapput ilaasortat ataatsimiinneranni.

#### Siulersuisut

§ 18. Siulersuisut immikkoortortaqarfiup ulluinnarni aqunneqarneranut akisussaasuupput, pisussaallutillu immikkoortortaqarfik SIK-p malittarisassai immikkoortortaqarfiullu nammineq malittarisassai naapertorluigit aqussallugu, soorlu siunertat suliassallu § 4-mi taaneqartut sulissutiginerat qulakkiissallugu. Taamattaq siulersuisut malissavaat SIK-p ataatsimeersuarnerani, nakkutilliisoqarfiani siulersuisuunerinilu aalajangiinerit kiisalu immikkoortortaqarfiup ataatsimeersuarnerani aalajangiinerit.

§ 19. Siulersuisut namminneq ulluinnarni suleriaasissartik aalajangersaavigissavaat, siulersuisut akornanni suliassat aalajangersimasut agguataarnissaannik minnerpaamik ilaqartusaaq, kiisalu siulersuisut ataatsimiittarnissaannut sulisullu sinniisaannik ilaasortanillu ataatsimeeqatiginnittarnissamik pilersaaruteqassallutik.

Imm. 2. Siulersuisut aalajangiisinnaassuseqarput siulersuisuni ilaasortat ikinnerpaamik pingasut peqataagaangata. Taasinerit naligiippata siulittaasup taasineri aalajangiisuusaaq. Siulittaasup peqannginnerani siulittaasup tulliata taasineri aalajangiisuusaaq.

Imm. 3. Siulittaasooq immikkoortortaqarfiup ingerlanneqarneranut akisussaasuni qullersaavoq, siulersuisulli aalajangernerisigut tamanna siulersuisuni ilaasortamut allamut akisussaaffittut tunniunneqarsinnaalluni.

Imm. 4. Immikkoortortaqarfiup ulluinnarni allaffissornikkut ingerlanneqarnera pillugu siulersuisut pisariaqartunik aalajangiisassapput, tamatumani aamma allaffimmi sulisunik atorfinitsinerit soraarsitsinerillu pillugit aalajangiinernik.

Imm. 5. Siulersuisuni ilaasortat allaffimmilu sulisut ajunngitsorsiassaat akissarsiaqartinneqarnerallu missingersuusiami ataatsimeersuarnermi imaluunniit ilaasortat ataatsimiinneranni akuersissutigineqartumi allassimassapput.

Siulersuisut imatut kajumissaaserneqassapput:

Siulittaasup qaammammut akissarsiaa, akileraarut atuuttoq najoqqutaralugu akileraaruserneqartassaaq. Siulersuisuni ilaasortat ukiumut ajunngitsorsiaat qaavatigut akileraaruserneqassaaq, akileraarutaat peqatigiiffiup akilissavaa. Siulittaasoq sulinermini qaammammut 1000 kr.-nik, allatsi ukiumut 1200 kr.-nik Siulittaasup tullia siulersuisunullu ilaasortat ukiumut 500 kr.-nik siulersuisunullu sinniisussat ukiumut 250 kr.-nik.

§ 20. Siulersuisut ataatsimiinnerannit imaqarniliaq SIK-p allattoqarfianut nassiunneqassaaq ataatsimiinnerup kingorna kingusinnerpaamik sap.ak. 3 qaangiutsinnagit.

§ 21. Siulersuisunut ilaasortaq Naalackersuisunut ilaasortatut toqqarneqaruni imaluunniit borgmesteritut qinigaaguni siulersuisunut ilaasortaajunnaassaaq.

Imm. 2. Siulersuisunut ilaasortaq politikikkut suliaqarnini pissutigalugu allamilluunnit pisuteqarluni siulersuisunut ilaasortatut suliasaminik isumaginnissinnaajunnaartutut naliliiguni, taanna siulersuisunut ilaasortaajunnaarluni aalajangersinnaavoq.

Tamanna taamaallaat piffissamut killilimmut atuuppat, pineqartoq sulinngiffeqarallarnissamut akuerineqaanarsinnaavoq. Sulinngiffeqarallarnissamut akuerineqartoq siulittaasuuppat, siulittaasup tullia sulinngiffeqarallarnernerup nalaani siulittaasutut atuutissaaq. Sulinngiffeqarallarnissamut akuerineqartoq siulittaasup tullerippagu, siulersuisut aalajangissapput siulersuisunut ilaasortaq sorleq sulinngiffeqarallarnernerup nalaani siulittaasup tulliatut atuutissanersoq. Sulinngiffeqarallarnissamut akuerineqartoq siulersuisunut ilaasortaappat siulittaasuunngitsoq imaluunniit siulittaasumut tulliuunngitsoq, siulersuisut aalajangersinnaapput sinniisussamik siulersuisunut ilaasortanngortoqassasoq sulinngiffeqarallarnernerup nalaani atuuttussamik, qinersinermi § 8-mi nr. 6-mi taaneqartumi taaneqarnerpaasimasumik.

Imm. 3. Siulersuisunut ilaasortaq immikkoortortaqarfiup aningaasaataanik atonerluisimasoq siulersuisunut ilaasortaajunnaarsinneqarsinnaavoq. Aningaasanik atonerluisimaneg ilaasortaajunnaarsitsinissaq pitinnagu kattuffiup kukkunersiuisuanit uppersarneqassaaq. Aammattaaq ilaasortaajunnaarsitsisoqarsinnaavoq siulersuisunut ilaasortaq paasissutissanik allagaatinilluunniit immikkoortortaqarfimmuut ajoqutaasumik atorsinnaasunik siulersuisunit akuerineqarani ingerlatitseqqiisimappat.

Imm. 4. Imm. 1-3-mi taaneqartutut pisoqarnerani siulittaasoq siulersuisunut ilaasortaajunnaarpat siulittaasup tullia siulittaasuunngussaaq ileqquusumik ataatsimeersuarnissami tullittumi siulittaasumik nutaamik qinersinissap tungaanut. Taava siulersuisut siulittaasup tullianik nutaamik qinersissapput. Tamatuma peqatigisaanik siulersuisuni sinniisussaq qinersinermi § 8-mi nr.6-mi taaneqartumi taaneqarnerpaasimasoq siulersuisunut ilaasortatut atuutilissaaq.

Siulersuisut aalajangersinnaapput periaaseq qulaani taaneqartoq atornagu immikkut ittumik ataatsimeersuariaqqusisoqassasoq piaarnerpaamik siulittaasussamik nutaamik qiner-



sinissaq siunertaralugu.

Imm. 5. Imm. 1-3-mi taaneqartut pisoqarnerani siulittaasup tullia siulersuisunut ilaasortaa-junnaarpat siulersuisut siulittaasup tullianik nutaamik qinersissapput siulersuisunut ilaa-sortat akornannit. Tamatuma peqatigisaanik siulersuisuni sinniisussaq qinersinermi § 8-mi nr. 6-imi taaneqartumi taaneqarnerpaasimasooq siulersuisunut ilaasortatut atuutilissaaq.

Imm. 6. Imm. 1-3-mi taaneqartutut pisoqarnerani siulersuisunut ilaasortamik siulittaasuun-gitsumik imaluunniit siulittaasumut tulliuungitsumik siulersuisunit tunuortoqarpat siuler-suisuni sinniisussaq qinersinersmi § 8 nr. 6-imi taaneqartumi taaneqarnerpaasimasooq ilaa-sortanngussaaq. Sinniisussat arlallit amerlaqatigiimmik taaneqarsimappata, imaluunniit sinniisussat taasinertaqanngitsumik qinigaasimappata, kina siulersuisunut ilaasortanngus-sanersooq makitsissutigineqassaaq.

Aningaasaqarneq, naatsorsuutit aamma kukkunersiuneq

§ 22. Immikkoortorta qarfiup ukiumoortumik naatsorsuutaasa qaammatisiutit ukiuat malissavaat.

Imm. 2. Siulersuisut immikkoortorta qarfiup naatsorsuutai akuersissutigissavaat, taakkulu tamatuma kingorna ilisimatitsissutitut ataatsimeersuarnermi imaluunniit ilaasortat ataa-tsimiinneranni saqqummiunneqassapput. Naatsorsuutit kukkunersiuisumit SIK-p ataatsi-meersuarnerani qinerneqarsimasumit kukkunersiorneqartassapput.

Imm. 3. Peqatigiiffiup naatsersuuserissunneqarnera SIK-p allattoqarfiani naatsorsuuseri-sumit ingerlanneqassaaq, taanna aammattaaq peqatigiiffiup kontuinut netbankikkut isersinnaanermut akuersissummik peqartussaalluni. SIK-p allattoqarfiata qaammatit ta-maasa naatsorsuutit allattukkat anisillugit immikkoortorta qarfimmu nassiuttassavai.

Atortorissaarutit maleruaqqusat aningaasanut akisussaassuseqarneq

§ 23. Immikkoortorta qarfik sinnerlugu atsiorsinnaatitaavoq siulittaasooq aamma ikinner-paamik siulersuisuni ilaasortaq ataaseq. Taarsigassarsiaqarnermi aamma illuutigisamik tunisaqarnermi pisinermilu imaluunniit qularnaveeqqusiussinermi peqatigiiffik sinnerlugu siulersuisunut ilaasortat tamarmik atsioqataassapput.

Imm. 2. Immikkoortorta qarfimmu ilaasortat immikkoortorta qarfiup pisussaaffigilersima-saanut inuttut ataasiakkaatut pisussaaffilerneqarsinnaanngillat.

Malittarisassanik allanngortitsineq

§ 24. Malittarisassat taamaallaat ataatsimeersuarnermi 2/3-mik amerlanerussuteqartunit allanngortinneqarsinnaapput, tassani allanngortitsinissamut siunnersuut ullormut oqaluu-serisassani allassimassalluni. Malittarisassat taakkua minnerpaamik imaqaassapput aalaja-

ngersakkanik immikkoortorta qarfiit malittarisassaanni nalinginnaasuni SIK-p ataatsimeersuarnerani akuersissutigineqarsimasuni allassimasunik.

Imm. 2. Malittarisassanik allanngortitsinerit ataatsimeersuarnermi akuersissutigineqarnerminniit atuutilissapput.

Immikkoortorta qarfirmik atorunnaarsitsineq

§ 25. Immikkoortorta qarfirmik atorunnaarsitsineq taamaallaat ataatsimeersuarnermi pisinnaavoq, tassani atorunnaarsitsinissaq ullormut oqaluuserisassani allassimassalluni, ataatsimeersuarnermilu peqataasut 2/3-isa siunnersuut akuerippassuk.

Imm. 2. Atorunnaarsitsinermi immikkoortorta qarfik akiitsoqarpat taakku akiligassaqarfinnut akilerneqassapput. Pigisat sinneruttut, tassunga ilanngullugit allataaviit protokolit, imaqarniliat il.il., SIK-p allattoqarfianut tunniunneqassapput.



Ataatsimeersuarnermi akuersissutigineqartut ulloq 20 Februar 2020

  
Siulittaassoq: Ulrik Lyberth

  
Siulittaasup tullia: Kitsia Petrussen

  
Allatsi: Bolethe Martinssen

  
Siulersuisunut ilaasortaq: Kirsten Goleathsen

  
Siulesuisunut ilaasortaq: Gertrud Rask V. Rosing